



Juramentu Ba Memburu FALINTIL-FDTL no PNTL: Hakotu Ka Hamaus Konflitu Grupu Arte Marisias?

Mahein Nia Lian Nú. 96, 30 Janeiru 2015



**Relatoriu Fundasaun Mahein Nia Lian ne'e suporta husi povu Amerikanu liu
husi Ajénsia Estadus Unidus ba Dezenvolvimentu Internasional (USAID) no
Embaxada Finlandia iha Jakarta.**

**Vizaun husi autor sira ne'ebé expresa iha públikasaun relatoriu sira ne'e la
reprezenta vizaun husi Ajénsia Estadus Unidus ba Dezenvolvimentu
Internasional (USAID) no Embaxada Finlandia.**



Website: www.fundasaunmahein.org



Kontiudu sira

Introdusaun	3
Metodolojia	3
Konflitu grupu arte marsiais	4
Rezolusaun no nia ezekusaun	5
Juramentu ba membru FALINTIL-FDTL no PNTL	7
Konkluzaun	9
Rekomendasaun	10
Bibliografia	11



Introdusaun

Relatoriu sira husi autoridade Estadu nian no organizasaun sosiedade civil iha tinan hirak ikus ne'e ko'alia maka'as kona-bá konfrontu sira ne'ebé sei ligadu ho grupu arte marsiais. Grupu hirak ne'ebé mensiona iha relatoriu ne'e la sees husi grupu problematiku hirak ne'ebé rezolusaun Governu nian mensiona iha tinan 2013. Hodí taka sira nia atividade total hanesan *Persaudaraan Setia Hati Terate* (PSHT), Kmanek Oan Rai Klaran (KORK) no *Ikatan Kera Sakti* (IKS).

Sai hanesan perguntas, tebes ka grupu hirak ne'e kontinua eziste ho nia atividade no involve direta iha konfrontu sira iha komunidade? Kazu ne'ebé sei diskute namanas hela iha sosiedade Timor-Leste no sai notisia prinsipal iha media nasional hotu-hotu. Iha tinan rohan 2014, antes tama Natal no hakat ba tinan foun 2015 konfrontu ida iha Munisipiu Baucau involve joven lubuk ida husi bairo, suku no Sub-administrasaun ne'ebé la hanesan. Iha ne'ebé ema hotu nia hare sei kait ho grupu arte marsiais. Rezultadu husi konfrontu ne'e hamate ema na'in tolu, sunu uma no oho animal hakiak sira.¹

Insidenti ida ne'e deskonfia involve membru balu husi Polisia Nasional Timor-Leste (PNTL) no FALINTIL-Força Defesa Timor-Leste (FALINTIL-FDTL). Nune'e mos relatoriu seluk husi monitorizasaun Fundasaun Mahein (FM) nian nota katak la hetan atuasaun seriu husi autoridade siguransa. Tuir komunidade sira iha area konflitu hato'o katak pesoal balu husi autoridade siguransa nia intervensaun iha tendensia maka'as hare liu ba grupu seluk no kontinua halo asaun konfrontativu.

Involvimentu husi pesoal siguransa hetan reasaun maka'as husi Ministru Defeza no Siguransa wainhira lidera seremonia juramentu ba membru FALINTIL-FDTL no PNTL ne'ebé involve iha grupu arte marsiais iha Palasiu Governu Ioron 13 fulan Janeiru tinan 2015. Iha ne'ebé temi pesoal seluk husi PNTL subar kaixaun no deskonfia maka'as involve iha grupu arte marsiais.²

Metodolojia

Metodolojia ne'ebé adopta hodí konklui relatoriu ida ne'e liu husi rekolla informasaun no literatura sira ne'ebé pública dahuluk ona husi NGO nasional, Intenasional no media sira. Nune'e mos dokumentu ofisial sira iha portal Governu nian inklui rezumu husi relatoriu FM ne'ebé pública ona tinan 2014. Diskusaun *Security Sector Development – SSD* iha nível ekipa peskizador no konversaun formal no informal sira

¹ Monitorizasaun Fundasaun Mahein nian ba konfrontu sira iha Baucau no Dili tinan rohan 2014 no tinan foun 2015.

² Intervensaun Premeiru Ministru nu'udar mos Ministru Defeza no Siguransa iha seremonia juramentu ba membru FALINTIL-FDTL no PNTL ne'ebé involve iha grupu arte marsiais hanesan PSHT, IKS no KORK, Ioron 13 fulan Janeiru tinan 2014 iha Palasiu Governu, Dili.



Konflitu grupu arte marsiais

Konflitu entre grupu arte marsial iha tempu okupasaun Indonezia ho númeru ne'ebé kiik no ladun kuiñese husi públiku. Iha tempu okupasaun Indonezia nian konflitu sira liga ho grupu arte marsiais dalabalu iha manipulasaun husi militar no milisia sira kona-bá konflitu sira ne'ebé akontese.

Maske nune'e grupu arte marsiais mos hola papel importante ida iha luta ba independensia Timor-Leste nian ho istoria ne'ebé diak hodi haforsa frente klandestina husi frente tolu ne'ebé luta hasoru invazaun Indonézia. Grupu arte marsiais sai hanesan movimento juventude ida atu fahe informasaun no fo apoiu ba malu hodi hametin Unidade Nasional. Kontinua organiza-an depois ukun-an sai kuiñesidu liu ho violensia.³

Nune'e mos iha tempu ukun-an, grupu arte marsial balu influensia no afilia ba asosiasaun política ikus mai manipulasaun política mos kontribui ba konflitu arte marsial sira.⁴ Grupu arte marsial balu sai kuiñesidu ho violensia tanba sira nia involvimentu iha rivalidade no incidenti violensia iha situasaun krize.⁵ Inklui mos arte marsial sira ne'ebé halo konflitu nadodon malu iha rai laran no kontinua iha estranjeiru.⁶

Konflitu entre grupu arte marsial sira iha tinan 2007 to'o 2013 konsidera tentativa maka'as ba estabilidade nasional. Iha ne'ebé Governu no Parlamentu Nasional deside taka arte marsial popular problematiku hanesan PSHT, KORK no IKS ho rezolusaun.⁷ Maske Parlamentu Nasional no Governu hasai ona rezolusaun hodi solusiona. Maibe kontinua organiza-an no halo rekrutamento nomos treinamento ba membru foun sira to'o tinan rohan 2014.

Pratika hirak ne'e justifika katak grupu arte marsial balu organiza malu hakat ba Indonezia hodi sa'e sabuk ka tuir graduasaun.⁸ Signifika atividade treinamento iha rai laran kontinua la'o no organizadu hodi komunika ba rai viziñu sira hodi ba tuir graduasaun. Nune'e orientasaun ka organiza husi rai liur. Hodi orienta nafatin atividade

³ Relatoriu Fundasaun Mahein. Mahein Nia Lian Nú. 93, Lisaun Ida Hodí Hakat Ba Oin Ho Dezafiu Foun Ba Estabilidade Nasional. Disponivel iha: http://www.fundasaunmahein.org/wp-content/uploads/2014/12/MNL_Nu.93_26122014-Situasaun-Siguransapdf.pdf. Asesu iha Ioron 29 fulan Dezembru tinan 2014

⁴ Ramos Naikoli, Antonio. Kompromisu Artes Marciais no Rituais ba Estabilidade, Seguransa no Tane soberania Nasional. Disponivel iha <http://forum-haksesuk.blogspot.com/2011/06/kompromisu-artes-marciais-no-rituais-ba.html>

⁵ Relatoriu Belun. Dinámika Konflitu no Violensia Liga ba Arte Marsiais iha Timor-Leste.

⁶ Arte Marsial Bandu iha Rai Laran, Nakfera iha Rai Liur. Disponivel iha <http://www.fundasaunmahein.org/2013/08/07/violence-quelled-at-home-explodes-abroad/>

⁷ Relatoriu Belun. Dinámika Konflitu no Violensia Liga ba Arte Marsiais iha Timor-Leste.

⁸ Monitorizasaun Fundasaun Mahein nian iha tinan rohan 2014, Unidade Patrullamentu Fronteira (UPF) postu Mota Ain kaptura membru husi grupu arte marsiais PSHT ne'ebé hakat ba Indonezia tuir graduasaun no entrega ba Komandu Distrital Maliana.



treinamento iha ralan no ba sa'e *sabuk* iha iha rai liur (Indonezia). PSHT husi Indonezia estaelese ona “Centro Informasaun” iha Timor-Leste desde tinan 2005.⁹

Kazu seluk, iha distritu Viqueque no distritu balu seluk, komunidade sira hato'o katak grupu arte marsial balu kontinua halo rekrutamentu no treinamento ba membru foun iha tempu kalan. Maske komunidade sira hato'o ona ba polisia maibe seidauk iha medida konkreta rumo hasoru grupu hirak ne'e. Informasaun seluk hato'o katak grupu hirak ne'e afilia mos partidu politiku no iha tempu treinamento nian treinador sira hato'o mos programa partidu nian no oinsa partidu bele manan iha eleisaun parlamentar tinan 2017.¹⁰ FM nia monitorizasaun, pratika hirak ne'e kontinua akontese tanba la iha sosializasaun no monitorizasaun diak ba rezolusaun ne'ebé hasai.

Rezolusaun no nia ezekusaun

Tinan 2013 taka total atividae arte marsial tuir rezolusaun nian haruka. Depois hasai rezolusaun no nia implementasaun, iha ka lae sosializasaun ba rezolusaun taka grupu arte marsiais ne'ebé mensiona iha rezolsaun? Nune'e mos iha ka lae monitorizasaun ba ezekusaun rezolusaun husi autor siguransa sira, ne'e sorin ida?

Iha sorian seluk, iha ka lae prosesu reintegrasaun ba grupu komunidade. Karik la iha, tanbasa la iha? Karik la iha, eis grupu arte marsiais sira sai abandonadu. Eis grupu arte marsiais sira kontinua abandona, ho nune'e ema seluk rekruta sira hodi halo krimen no konflitu komunal sira. Ikus konflitu sira iha komunidade ho konkluzaun katak ne'e grupu arte marsiais. Nune'e konkluzaun sira ne'e lejitima nafatin ezistensia grupu arte marsiais sira ne'ebé mensiona iha rezolusaun.

Parte seluk mos, tratamento ba eis grupu arte marsiais sira la integradu. Lulos tenki husi parte tomak Estadu nian. Oinsa bele reintegra eis membru grupu arte marsiais sira iha grupu komunidade. Nune'e sira bele hola parte nu'udar grupu komunidade ida. Portantu durante ne'e grupu idak-idak organiza nia-an no orienta tuir grupu nia interese ikus monu ba violensia.

Tanba la iha sosializasaun no monitorizasaun ne'ebé diak hetok aat liu tratamento no reintegrasaun ba grupu komunidade. Konflitu sira liga ho grupu arte marsias sira kontinua hetok sai aumenta liu tan, rezulta oho malu, estragus, sunu uma no oho animal hakiak sira.

FM nia monitorizasaun rejista insidenti ne'ebé boot liu liga ho grupu arte marsiais depois rezolusaun ne'e sai, iha tinan 2014. Insidenti boot liu akontese iha Baukau. Iha ne'ebé ema na'in tolu mate no seluk kanek, inklui estragus, sunu uma no oho animal hakiak

⁹ Hare iha portal PSHT nian. <http://www.shterate.com/sambutan-ulang-tahun-padeponkan-wesi-aji-psht-semarang/>

¹⁰ Monitorizasaun Fundasaun Mahein iha ne'ebé komunidade sira hato'o kona-bá atvidade arte marsial iha distritu Viqueque, iha fulan Dezembru tinan 2014.



sira. Insidenti ne'e tuir monitorizasaun FM nian sei iha ligasaun forte ho grupu arte marsiais hanesan PSHT no IKS.

Insidenti dahuluk liu iha loron 22 fulan Dezembru tinan 2014, akontese iha Aldeia Rulo, Suku Bahu, Postu Administrativa Baucau. Grupu deskoñesidu asaltu joven mane na'in rua, ida mate kelas iha fatin. Joven mane na'in rua ne'e la'o hela iha estrada, fila husi vizita nia familia, derepente to'o iha area Katedral nia oin, grupu deskuiñesidu asaltu sira. Insidente ne'e rezulta joven ida mate kelas iha fatin no joven ida seluk kanek todan. Motivu insidente ne'e la klaru maibe deskonfia sei iha relasaun ho problema grupu arte marsiais.¹¹

Iha Postu Administrativa Laga, Suku Nunira, ema ida mate no restu seluk hetan kanek iha loron 30 fulan Dezembru tinan 2014. Insidenti ne'e sei iha ligasaun forte ho konflitu sira grupu arte marsiais. Iha ne'ebé deskonfia mai husi grupu arte marsiais PSHT no IKS.¹²

Insidenti hanesan nafatin iha Baucau nu'udar kontinuasaun husi kazu omesidu ne'ebé akontese iha Postu Administrativu Laga nian. Iha loron 30 fulan Dezembru tinan 2014 Eis membru IKS asalta eis membru PSHT to'o mate, iha Suku Buruma, Postu Administrativa Laga.¹³

FM nia monitorizasaun insidenti hirak ne'e, maske antes ne'e komunidade sira informa ona ba autoridade polisia. Iha ne'ebé deskobre katak grupu joven sira hahu organiza malu depois insidenti dahuluk akontese. Maibe la hetan atuasaun seriu husi polisia. Hetok aat liu, komunidade sira deskonfia pesoal balu husi autoridade polisia nian involve mos iha grupu hirak ne'e.

Ikus atuasaun la'o tarde depois insidente sira ne'e mosu no rezulta ema na'in tolu mate iha loron hirak tutuir malu iha ultimu fulan Dezembru nia laran tinan 2014. Konsekuensia todan seluk, sunu uma, estragus no oho animal hakiak sira. Hetok aat liu, konfrontu sira ne'e utiliza labarik idade minoria hodi provoka malu.

¹¹ Monitorizasaun Fundasaun Mahein ba insidenti ne'ebé liga ho grupu arte marsiais ne'ebé akontese iha Postu Administrativa Laga – Baucau, tinan 2014.

¹² Monitorizasaun Fundasaun Mahein ba insidenti ne'ebé liga ho grupu arte marsiais ne'ebé akontese iha Postu Administrativa Laga – Baucau, tinan 2014.

¹³ Monitorizasaun Fundasaun Mahein ba insidenti ne'ebé liga ho grupu arte marsiais ne'ebé akontese iha Postu Administrativa Laga – Baucau, tinan 2014.

Asaltu entre grupu sira husi arte marsiais no oho animal hakiak iha Baukau tinan 2014



Foto: Fundasaun Mahein (FM) tinan 2014

Nune'e implika mos ba movimentu populasaun nian iha area sira insidenti sira ne'e akontese. Ironiku liu tan, joven sira husi grupu hirak ne'ebé involve iha insidenti ne'e halo pasa revista iha Estrada públigu maibe la iha atuasaun husi autoridade polisia. Ikus Governu diside intervensaun konjunta ida husi PNTL no FALINTIL-FDTL ba situasaun iha Baukau hodi restaura hikas ordem públika.

Insidenti seluk akontese iha Dili ne'ebé rejulta ema ida mate tanba hetan sona husi joven mane seluk iha loron 30 fulan Dezembru tinan 2014. Akontese iha Aldeia Beto Naroman, Suku Comoro, Postu Administrativa Dom Aleixo. Motivu husi insidente ne'e seidauk klaru tanba suspeitu halai subar to'o agora seidauk hatene nia paradeiru. Maibe fontes balun deskobre katak motivu husi insidente ne'e tanba diferença grupu arte marsiais, vitima husi organizasaun IKS no suspeitu husi PSHT.¹⁴

Hanesan naktemi tiha ona iha sesaun dahuluk ba hafoin insidenti sira ne'e Governu nia atuasaun diside intervensaun konjunta ida hodi restaura hikas ordem públika. Kontinua ho juramentu ba membru ativu FALINTIL-FDTL no PNTL ne'ebé involve iha grupu arte marsiais hanesan PSHT, IKS no KORK iha loron 13 fulan Janeiru tinan 2015. Nune'e juramentu ida ne'e direje diretamente husi Premeiru Ministru nu'udar mos Ministru Defeza no Siguransa Xanana Gusmão iha Palasiu Governu, Dili.

Juramentu ba membru FALINTIL-FDTL no PNTL

Membru PNTL no F-FDTL ne'ebé involve iha arte marsiais halo juramentu iha Palacio Governu nia oin hodi hakribi no la mete atividades arte marsiaias ba iha futuru.

¹⁴ Monitorizasaun Fundasaun Mahein ba insidenti ne'ebé liga ho grupu arte marsiais ne'ebé akontese iha Dom Aleixo – Dili, tinan 2014.

Serimónia juramentu ne'e hala'o liu husi parade militar, diriji direitamente husi Primeiru Ministru Kay Rala Xanana Gusmão hanesan mos Ministru Defeza no Seguransa, iha Ioron Tersa, 13 fulan Janeiru tinan 2015.

Memburu PNTL no FALINTIL-FDTL ho total 288 maka halo juramentu husi eis membru PSHT hamutuk 145, eis membru IKS hamutuk 88 no eis membru KORK hamutuk 55. Juramentu iha bandeira RDTL no bandeira instituisaun rua nian oin, hanesan juramentu ba povu no nasau. Hodi ba oin eis membrus arte marsiais hirak ne'e sei la mete tan no sei kumpri lolos deit lei no hakruk ba Estadu no Konstituisaun.

Juramentu ne'e esforsu husi Estadu liu husi Governu hanesan dalan diak no presiza duni, maibe mos presiza hametin regulamentu internal PNTL no FALINTIL-FDTL. PM Xanana dehan, ba oin maka membru sira ne'ebe maka halo juramentu tiha sei nafatin hala'o atividades arte marsiais sei hasai husi forsa no polisia. Nune'e lalika lori organizasaun arte marsiais mai boot liu fali intereses instituisaun Estadu.

Estadu la obriga sese deit atu tama PNTL no FALINTIL-FDTL, maibe hanesan bainhira ema ida hakarak sai membru PNTL no FALINTIL-FDTL tamba hakarak defende povu no ninia moris, laos tama hodi buka deit osan maibe iha dever boot ba Estadu no povu ida ne'e.

"Hau rona membru PNTL balun fasilita ita nia joven sira hodi hakat ba Kupang hodi halo juramentu ba bandeira merah putih nomos membru FALINTIL-FDTL balun dehan ba joven sira katak lalika tauk ho sese deit ami backing iha kotuk. Ida ne'e hau la gosta ho ida ne'e maka ohin loron mai halo juramentu ne'e. Ba oin sei laiha tan arte marsiais iha PNTL no FALINTIL-FDTL nia laran."¹⁵

Nune'e mos Komandu Jeral PNTL sei kontinua bolu membru PNTL balu ne'ebe involve-an iha grupu arte marsiais no seidauk halo juramentu iha Palasiu Governu iha Ioron Tersa, 13 fulan Janeiru tinan 2015, hodi halo juramentu ba Bandeira RDTL katak ba oin sei la involve tan ona iha grupu arte marsiais.

Komisariu Polisia Afonso de Jesus hato'o katak:

"Ita hatene katak membru PNTL ne'ebe involve iha grupu arte marsiais ne'e hamutuk na'in 174, na'in 100 resin mak halo ona juramentu iha Palacio do Governu no balun seidauk, tamba ne'e Komando sei tenta nafatin atu bolu sira ne'ebé seidauk halo juramentu. Komisariu Afonso hatutan, hafoin halo juramentu mak membru hirak ne'e sei involve nafatin iha Grupu refere, no Komando hetan evidénsia ne'ebe forte mak sei la tolera tan, no tenke halo demisaun ba membru refere."¹⁶

¹⁵ PNTL no F-FDTL 288 Juramentu Hodi Hakotu ho Arte Marsiais. Disponivel iha <http://www.pntl.tl/2015/01/14/pntl-no-f-fdtl-288-juramentu-hodi-hakotu-ho-arte-marsiais/>. Asesu iha Ioron 19 fulan Janeiru tinan 2015.

¹⁶ KJ kontinua bolu Membru PNTL ne'ebe involve GAM hodi tuir Juramentu. Disponivel iha <http://www.pntl.tl/2015/01/15/kj-kontinua-bolu-memburu-pntl-neeebe-involve-gam-hodi-tuir-juramentu/>. Asesu iha Ioron 19 fulan Janeiru tinan 2015.



FM bemvindu ba atuasaun Governu nian hasoru kandidatu rekrutadu ida ba ajente PNTL ne'ebé involve iha grupu arte marsiais hodi hasai husi Insitituisaun PNTL antes ba formasaun iha inisiu tinan 2015 depois juramentu ne'e liu tiha.¹⁷ Maibe atu hatur lolos atuasaun sira ne'e ho justu no tuir lei no regulamentu sira. Elementu ativu sira ne'ebé identifika ona no tuir juramentu iha iha loron 13 fulan Janeiru tinan 2015 tenki demite mos husi instituisaun rua ne'e. Portantu juramentu ida ne'e iha juramentu seluk nia leten. Iha ne'ebé membru FALINTIL-FDTL no PNTL wainhira tama sira halo uluk tiha ona juramentu hodi kumpri lolos sira nia misaun tuir Konstituisaun nian haruka.

Sosiedade tomak tantu husi politiku to'o povu kiik sira nia hare katak juramentu ida ne'e sei la garante neutralidade militar no polisia nian no hatauk sira sei la involve tan iha grupu arte marsiais. Maibe hamaus konflitu no hafraku deit lei no regulamentu. Portantu juramentu ida ne'e la iha nehan atu tata. Signifika katak juramentu ne'e hanesan buat abstratu ida no la kesi elementu sira ne'ebé involve iha grupu arte marsiais. Iha ne'ebé sira komuga ona doutrina seluk no halo uluk ona juramentu seluk ne'ebé aplika iha grupu arte marsiais nia laran.

FM nia hare atu hakotu korente konflitu sira ne'ebé liga ho arte marsiais no involve husi membru FALINTIL-FDTL no PNTL. Demite sira husi instituisaun rua ne'e. Portantu sira nia prezensa iha juramentu ne'e justifika ona katak sira involve duni iha grupu arte marsiais. Iha ne'ebé durante ne'e públiku no sosiedade tomak nia preokupasaun kona-bá involvimentu membru FALINTIL-FDTL no PNTL iha grupu arte marsiais. Maibe la iha evidensia koncreta ruma hodi hatudu kona-bá sira nia involvimentu.

Konkluzau

Konflitu arte marsiais sei la hotu no kontinua sai hanesan ameasa ba estabilidade nasional. Nune'e juramentu sira ne'ebé liu dadauk sei la iha nehan atu tata. Portantu iha iha tinan 2008 membru sira husi grupu arte marsiais halo uluk ona juramentu maibe la garante estabilidade no konflitu sira liga ho arte marsiais. Hetokaat liu, Governu hasai rezolusaun dahuluk iha tinan 2012 hodi suspende sira nia atividade maibe konflitu arte marsiais kontinua akontese. To'o tinan 2013 rezolusaun seluk tan husi Governu hodi taka total sira nia atividade hanesan PSHT, IKS no KORK maibe atividade treinamento kontinua la'o no justifika grupu seluk hakat fronteira ba Indonezia sa'e *sabuk* ka graduasaun. Konflitu arte marsiais kontinua to'o tinan roha 2014.

Inisiu tinan 2015, juramentu seluk tan halo ba membru FALINTIL-FDTL no PNTL hodi la involve tan iha grupu arte marisias. Karik ho juramentu bele garante ona estabilidade? Nune'e bele hakotu ona ligasaun membru FALINTIL-FDTL no PNTL sira ho grupu arte marsiais? Ka hamaus konflitu no hafaraku deit lei no regulamentu?

¹⁷ Hare iha publikasaun media loron 19 Janeiru 2015.



Rekomendasaun

1. Sosializasaun no monitorizasaun ba rezolusaun taka grupu arte marsiais hanesan PSHT, IKS no KORK.
2. Reintegrasaun eis grupu arte marsias ba iha grupu komunidade ho tratamentu ida integradu.
3. FALINTIL-FDTL no PNTL tenki halo *screening* ba nia membru sira husi eis membru grupu arte marsiais.
4. Asuntu grupu arte marsiais tenki sai kriteriu ba rekrutamentu ba membru FALINTIL-FDTL no PNTL.
5. Asaun forte ka regoruzu husi autor justisa ka siguransa tenki maka'as ba asaun grupu arte marsias.



Bibliografia

Arte Marsial Bandu iha Rai Laran, Nakfera iha Rai Liur. Disponivel iha <http://www.fundasaunmahein.org/2013/08/07/violence-quelled-at-home-explodes-abroad/>

Hare iha portal PSHT nian. <http://www.shterate.com/sambutan-ulang-tahun-padepokan-wesi-aji-psht-semarang/>

Intervensaun Premeiru Ministru nu'udar mos Ministru Defeza no Siguransa iha seremonia juramentu ba membru FALINTIL-FDTL no PNTL ne'ebé involve iha grupu arte marsiais hanesan PSHT, IKS no KORK, Ioron 13 fulan Janeiru tinan 2014 iha Palasiu Governu, Dili.

KJ kontinua bolu Membru PNTL ne'ebe involve GAM hodi tuir Juramentu. Disponivel iha <http://www.pntl.tl/2015/01/15/kj-kontinua-bolu-memburu-pntl-neebi-involve-gam-hodi-tuir-juramentu/>. Asesu iha Ioron 19 fulan Janeiru tinan 2015.

Monitorizasaun Fundasaun Mahein nian ba konfrontu sira iha Baucau no Dili tinan rohan 2014 no tinan foun 2015.

Monitorizasaun Fundasaun Mahein nian iha tinan rohan 2014, Unidade Patrullamento Fronteira (UPF) postu Mota Ain kaptura membru husi grupu arte marsiais PSHT ne'ebé hakat ba Indonezia tuir graduasaun no entrega ba Komandu Distrital Maliana.

Monitorizasaun Fundasaun Mahein iha ne'ebé komunidade sira hato'o kona-bá atvidade arte marsial iha distritu Viqueque, iha fulan Dezembru tinan 2014.

PNTL no F-FDTL 288 Juramentu Hodi Hakotu ho Arte Marsiais. Disponivel iha <http://www.pntl.tl/2015/01/14/pntl-no-f-fdtl-288-juramentu-hodi-hakotu-ho-arte-marsiais/>. Asesu iha Ioron 19 fulan Janeiru tinan 2015.

Ramos Naikoli, Antonio. Kompromisu Artes Marciais no Rituais ba Estabilidade, Seguransa no Tane soberania Nasional. Disponivel iha <http://forum-haksesuk.blogspot.com/2011/06/kompromisu-artes-marciais-no-rituais-ba.html>

Relatoriu Fundasaun Mahein. Mahein Nia Lian Nú. 93, Lisaun Ida Hodi Hakat Ba Oin Ho Dezaifiu Foun Ba Estabilidade Nasional. Disponivel iha: http://www.fundasaunmahein.org/wp-content/uploads/2014/12/MNL_Nu.93_26122014-Situasaun-Siguransapdf.pdf. Asesu iha Ioron 29 fulan Dezembru tinan 2015

Relatoriu Belun. Dinámika Konflitu no Violensia Liga ba Arte Marsiais iha Timor-Leste.